

四庫全書

子部

欽定四庫全書

六藝之一錄卷五十六

錢唐倪濤撰

石刻文字三十二

魏橫海將軍呂君碑

君諱

闕六字

博望人也其先四嶽出自炎帝

闕八字

內輔機

衡外司方職是以

闕

族繁毓申呂並興君其胄也君天

姿果毅仍

闕

於武武而不害當值季末漢失其御羣雄

爭逸海內

闕

隔王塗穢塞君以中勇顯名州司試守雉

長執戈秉戎慎守疆場兵不頓於敵國地不侵於四鄰
拜武猛都尉厲節中郎將裨將軍封關內侯王師南征
與充軍從奄有江漢舍爵冊勲封陰德亭侯領郡鳩集
荒散為民統紀三考有成轉拜平狄將軍改封廬亭侯
莅國賦政十有三年正身帥下儉以足用食不貳膳坐
不重席廐無食粟之馬出無副車之從生不利家死不
託孤可謂良大夫也雖叔敖相楚晏嬰在齊不能尚也
行師御衆暑即不蓋寒即不裘其於戰也即履矢石之

所及鋒刃之所先雖古良將不能踰也會西蜀起兵猖
獗為寇蕩搖邊鄙度劉民人而洪水播溢沉沒樊城平
源十刃外瀆潛通猛將驍騎載沈載浮於是不逞作慝
羣兇鼎沸或保城而叛或率眾負旌自即敵門中人以
下竝生異心君威懷之信臨難益著故能桀然攘除姦
逆獨存社稷連城十三民無虺蜴帝加其庸轉拜橫海
將軍徙封西鄂都鄉侯食邑七百戶將遂聞聲於方
表掃醜虜於南域建元功於大魏書洪闕於宗彞不弔

昊天降茲災咎寢疾一旬大命隕墜年六十有一黃初

二年正月

闕

子薨於

闕

帝主閔

闕

察傷悼使謁者弔

祠賻贈有加臣吏士庶莫不哀

闕

於是故郡吏

闕

楊

向

闕

追惟惠君攀慕罔極迺共刊石勒銘昭示來裔

其辭曰

炎靈降精嶽祚後昆膺期誕授實生我君桓桓

闕

毅抑

之以文

闕

整軍容八在惠民禦敵用威附下以仁儀刑

既著允濟

闕

勲鑽功金石

闕

下

碑以中勇為忠勇畫易為疆場平原十刃為平原
十刃隕隧為隕墜墜即地字稷即稷字感即貳字
刃即播字

右故魏橫海將軍章陵太守都鄉侯呂君之碑篆額
呂君名字皆剝剝以黃初二年卒關羽傳云建安二
十四年羽攻曹仁於樊秋霖水溢于禁七軍皆沒羣
盜遙受印號為之支黨羽威震華夏曹公議遷許以
避之碑云西蜀兵起猖獗為寇洪水播溢猛將沈沒

羣凶鼎沸皆實錄也魏隸之佳者惟鍾梁之碑四若
范式之碑則又次之此刻差勝賈逵劉熹爾姑存之

隸
釋

碑云君諱朗字義先博望人也其先四岳出自炎帝
年六十有一黃初二年正月薨夏侯湛撰郡吏楊向

勒銘碑在南陽縣

集古
錄目

黃初二年立於鄧州南陽舊錄云夏侯湛文

漢隸
字原

魏新野侯碑

黃初七年

金石略

魏劉盆碑

在邠州梁澤縣正始二年立在墓側

天下碑錄

魏南郡太守卞統碑

右魏南郡太守卞統碑在今曹州宛句縣所敘世次官闕甚簡又多殘闕其略云君諱統字建業又云惟帝念庸命叩南邦又云嘉平二年十一月己亥寢疾卒官而其首題魏故南郡太守卞府君之表按晉書

卞壺傳濟陰宛句人祖統瑯琊內史而元和姓纂亦云統為晉琅琊內史今此碑殘缺處猶有琅琊字尚存知其嘗為此官而統以魏嘉平中卒姓纂以為仕

晉者誤也

金石錄

魏太妃郭氏碑

正元二年在西京

金石略

襄州刺史劉君碑

正元三年有碑陰

金石略

魏太僕荀君碑

右魏太僕荀君碑其額題魏故太僕西陽亭成侯荀
府君之碑碑已殘缺其可見者嘗為齊相始平太守
大將軍長史封西陽亭侯遂為太僕春秋五十有一
正始五年夏六月丙寅薨惟其名字鄉里磨滅不可

考矣

金石錄

魏孫炎碑

甘露五年在淄州

曹仁記水碑

魯城南有曹仁記漢水溢碑

盛弘之
荊州記

曹真祠堂刻石

曹真祠堂在北邙山刊石既精書亦甚工

述征
記

魏虞歆碑

虞歆字文肅歷郡守節操高厲魏曹植為東阿王東
阿先有三十碑銘多非實植皆毀除之以歆碑不虛

獨全焉

會稽
典錄

魏徐庶碑

彭城內有魏中郎徐庶碑

水經注

魏何伯申碑

在陳留縣東北十五里

訪碑錄

魏徐州刺史韓陵碑

在東明縣南二十里

訪碑錄

魏酸棗令母邱悅碑

在酸棗廢縣內按其文名悅字抱僖魏正光三年任

酸棗令民為立碑

訪碑錄

魏太傅鍾繇碑

在尉氏縣西北三十五里鍾城南三里今割屬中牟

按中牟圖經云鍾城有鍾繇古碑斷折文字磨滅

天下

碑錄

魏隱士程冲碑 節婦白氏碑

在封邱縣按程隱君墳在縣西南四里碑當在墓下

天下碑錄

程冲字孔禮陳畱封邱人有志行明帝青龍三年徵

不起景初二年正始五年徵又不就晉武帝泰始二

年卒封元鄉亭侯

寰宇記

白氏冲妻也晉咸熙中建二碑同處

金石略

魏御史大夫袁渙碑

在太康縣

天下碑錄

魏征虜將軍南州刺史王賢思碑

按圖經賢思名亮碑在雍邱縣北五十里義縣鄉墓

下

天下
碑錄

中山太守常通碑

在祁州

天下金
石志

羊續碑

在兗州

天下金
石志

車騎將軍穆祚碑

隸書在介休縣

天下金
石志

魏馮劬墓碑

在潞州府

天下金
石志

魏并州刺史王恒碑

隸書在州東南二里墓傍

天下金
石志

武州山耿氏三家誌

在大同府僅存銀青光祿昭勇數字

天下金
石志

魏陸嚴墓碑

在潞州府

太保任公神道

金石
錄

魏太尉滿寵碑

金石略

魏下豫州刺史修老子廟詔

黃初三年

隸續

黃初三年立在亳州集古作太清東闕題名

漢隸字原

余自至亳始得悉閱太清之碑其佳者悉已入余集

古錄乃知余之集錄所得多矣惟兩石闕題名未有

今續錄于此熙寧元年二月十九日書

集古錄

魏周公禮殿石楹記

初平五年鍾會書成都府

金石略

伊闕左右石壁銘

千金竭石人銘

伊水又北入伊闕昔大禹䟽以通水兩山相對望之
若闕伊水歷其間北流故謂之伊闕矣陸機云洛有
四闕斯其一焉東巖西嶺並鑄石開軒高豐架峰西
側靈巖下泉流東注入于伊水傅毅反都賦云因龍
門以暢化開伊闕以達聰也闕左壁有石銘云黃初
四年六月二十四日辛巳大出水舉高四丈五尺齊

此已下蓋記水之漲沒也右壁又有石銘曰永康五
年河南府君循大禹之軌部督郵辛曜新城令王琨
部監作掾董倚李褒斬岸開石平通石闕石文尚存

也

注水經

河南十二縣境薄曰河南縣城東十五里有千金塢
洛陽記曰千金塢舊堰穀水魏時更修此堰謂之千
金塢積石為塢而開溝渠五所謂之五龍渠渠人立
塢塢之東首立一石人石人腹上刻勒云太和五年

二月八日庚戌造築此塢更開溝渠此水衡渠上其
水助其堅也必經年歷世是故部立石人以記之云
爾蓋魏文帝修王張故績塢是都水使者陳協所造
也逮于晉世大水暴注溝瀆泄壞又廣功焉石人東
脇下文云太始七年六月二十三日大水并瀑出常
流上三丈蕩壞二塢五龍泄水南注瀉下加歲久漱
齧每滂即壞歷載損棄大功故為今塢更於西開泄
名曰代龍渠地形正平誠為瀉泄至理千金不與水

勢激爭無緣當壞由其卑下水得踰上激鬪故也今
增高千金於舊一丈四尺五龍自然必歷世無患若
五龍歲久復壞可轉於西更開二塢二渠合用二十
三萬五千六百九十八功以其年十月二十三日起
作功重人少到八年四月二十日畢代龍渠即九龍
渠也千金塢石人西脇下文云若溝渠久䟽深引水
者當於河南城北石磧西更開渠北出使首孤立故
溝東下因故易就磧堅便時事業已訖然後見之加

邊方多事人力苦少又渠竭新成未患於水是以不敢豫修通之若於後當復興功者宜就西磧故書之於石以遺後賢矣

同上

魏劉靖碑并戾陵堰表

鮑邱水入潞高粱水注之首受濕水於戾陵堰水自堰枝分東逕梁山南又東北逕劉靖碑北碑云魏使持節都督河北道諸軍事征北將軍建城鄉侯沛國劉靖字文恭登梁山以觀源流相原隰以度形勢嘉

武安之通渠美秦民之殷富乃使帳下督丁鴻軍士

千人以嘉平二年立遏

遏當作場

於水道高梁河造戾陵

遏開車箱渠其遏表云高梁河水者出自并州黃河

之別源時長岍峻固直截中流積石籠以為主遏高

一丈東西長三十丈南北廣七十餘步依北岸立水

門門廣四丈立水竭長十丈山水暴戾則乘遏東下

平流守常則自門北入灌田歲二千頃凡所封地百

餘萬畝至景元三年辛酉詔書以民食轉廣陸廢不

瞻遣謁者樊晨更制水門限田千頃刻地四千三百一十六頃出給郡縣改定田五千九百三十頃水流乘車箱渠自薊西北逕昌平東盡漁陽潞縣凡所潤合四五百里所灌田萬有餘頃高下孔濟原隰底平䟽之斯溉決之斯散導渠口以為濤門灑漑池以為甘澤施加於當時敷被於後世晉元康四年君少子驍騎將軍平鄉侯弘受命使持節監幽州諸軍事領護烏丸校尉寧朔將軍遏立積三十六載至五年夏

六月洪水暴至毀損四分之三乘北岸七十餘丈上渠車箱所在漫溢追惟前立遏之勲親臨山川指授規略命司馬關內侯逢惲內外將士二千人起長岸立石渠修立遏治水門門廣四大立水遏五尺興復載利道塞之宜準遵舊制凡用功四萬有餘焉諸部王侯不召而自至襁負而趨事者蓋數千人詩載經始勿亟易稱民忘其勞斯之謂乎於是二府文武之士感秦國思鄭渠之績魏人置豹祀之義乃遐慕仁

政追述成功元康五年十月十一日刊石立表以紀
勲烈并記過制度永為後式焉

水經注

論漢晉碑

與董彥遠同觀文翁學生題名予謂董云結體殊不
類隸董云集古錄以為文翁學生予云嘗攷此碑其
郡望有云江陽寧蜀遂寧晉原以晉志攷之江陽蜀
置此郡寧蜀遂寧晉原皆是宣武平蜀後置彥遠擊
節此言以為辨正精詳又問予云周公禮殿記云甲

午年故府梓潼文君不審文君之名予云華陽國志
載文參字子奇梓潼人平帝用為益州太守記中文
君乃此人也甲午乃光武建武十年云且如漢成臯
令任碑云字伯嗣名已缺任延熹中守官按漢桓紀
延熹八年桂陽太守任胤乃此人故其字伯嗣予又
云備員祕館累年御府降出太清樓奇書異傳甚富
今參校得失予喜觀未見書同舍出省後予嘗侵晚
而歸董云異書不可不看迨初除正字供職未幾乃

以平日所疑故事因閱記傳決疑者多自此後論議
覺進信知書不負人也所恨未嘗獲覩太清樓書予
又論集古錄有踈脫處如跋漢倉頡廟碑云此碑有
蓮勺左鄉有秩池陽左鄉有秩池陽集丞有秩皆不
知是何名號予按前漢書張敞以鄉有秩補太守卒
吏後漢百官志鄉置有秩三老游徼本注曰有秩郡
所署秩百石掌一鄉人注引漢官儀載戶五千則置
有秩風俗通云有秩則田間大夫言其官裁有秩爾

蓋鄉吏之名號也又論水經與漢碑刻不同者多如
王純碑道元注云王紛碑又州輔碑道元注云州苞
如袁良碑道元注云袁梁又如屬國都尉王君碑道
元注云蜀都太守姓王字子雅彥遠云恐忘記遂盡

錄去

東觀
餘論

宋書禮志曰漢以後天下送死奢靡多作石室石獸
碑銘等物建安十年魏武以天下彫弊下令不得厚
葬又禁立碑故高貴鄉公甘露二年大將軍參軍太

原王倫卒倫兄俊作表德論以述倫遺美云祇畏王
典不得為銘乃撰錄行事就刊於墓之陰云爾此則
碑禁尚嚴後復弛替晉武帝咸寧四年又詔曰此石
獸碑表既私褒美興長虛偽傷財害人莫大於此一
禁斷之其犯者雖會赦令皆當毀壞至元帝大興元
年有司奏故驃騎府主簿故恩營葬舊君顧榮求立
碑詔特聽立自是後禁又漸頽大臣長吏人皆私立
義熙中尚書祠部郎中裴松之又議禁斷於是至今

裴松之傳曰松之以世立私碑有乖事實上表陳之
由是並斷以故終魏之世略無紀功述行之文其立
碑之見於史者惟田豫顏斐二人而晉世則扶風王
駿魏舒羊祜杜預閻德唐彬嵇紹丁紹范平立碑之
事百有餘年亦僅七八見齊建武中范雲上表求為
太宰竟陵王立碑事竟不行其載昭明太子選中所
引亦止太宰褚淵丞相豫章王二例若劉劭之生為
立碑安成王蕭秀之四碑並建史家書之以為異事

而自魏至陳文字之罕傳於後有繇然矣隋書禮儀志梁天監六年申明葬制凡墓不得造石人獸碑唯

聽作石柱記名位而已

金石文字記

又考漢末蔡中郎集中胡廣陳寔各三碑楊賜橋玄胡碩各二碑又袁滿來年十五胡根年七歲各有碑夫一人而至二碑三碑冗矣殤子而為之立碑濫矣至於闕樓人獸飾亦多在桓靈之世水經注言閹寺擅權五侯暴世割剝公私以事生死如荊州刺史李

剛之石闕祠堂四壁隱起彫刻為君臣官屬龜龍麟
鳳之文飛禽走獸之像引農太守張伯雅之引水入
瑩域為池沼蟾蜍吐水石湟承溜蜀郡太守王子雅
之石樓雙峙藥櫃承拱雕簷四柱窮巧綺刻妙絕人
工者為葬殖之侈一至于此繇上之人不為之限制
也然則魏武之禁其可已乎

金石文
字記

吳碑

吳大帝碑

皇象書吳大帝碑在江寧府書雖本漢隸然探奇振
古有三代純樸氣自是絕藝非如東漢遺書循一矩
律藉蹈綴襲竊而自私也自王志愔定錄古今書而
象已在著錄中至庾肩吾以象品入上中其後李嗣
真因之不改不知當時所定果何据也羊欣稱象善
草書世稱沈着痛快而張懷瓘稱象惟小篆入能品
其他不見稱於人今官書有象章草帖故自精深奇
崛前世獨不言象為隸字何也意謂既以書入品第

則或不盡著其言又諸人或有兼數書著者此又不可知也余疑此碑近出書畫尚完故是前人未見當其評書時不得睨於其間也不然書隸至此而可遺其品目哉象尺書曰太子屏風在此已久而未得之又曰想必醉令作鱧魚梅羹相待其自矜持如此廣川

跋書

吳國山碑

右吳國山碑者孫皓天冊元年禪於國山改元天璽

因紀其所獲瑞物刊石於山陰是歲晉咸寧元年後
五年晉遂滅吳以皓昏虐其國將亡而衆瑞並出不
可勝數後之言祥瑞者可以鑒矣

集古錄

不著撰人名氏吳中書東觀令史立信中郎將蘇建
篆歸命侯天冊元年得玉璽於吳興文曰吳真皇帝
遂改明年元為天璽刊石告禪於國山之陰其所述

瑞應凡千有二百餘事

集古錄目

右吳禪國山碑其前叙孫皓即位以後祥瑞凡千餘

言又其後云乃以涪灘之歲欽若昊天月正華元郊
天祭地紀號天璽又云丞相沈太尉瑒大司徒燮大
司空朝等以為今衆瑞畢至三表納貢九垓八埏無
不被澤率按曲繇宜先行禪禮紀勒天命遂於吳興
國山之陰告祭刊石以對揚乾命廣報坤德按皓以
丙申歲改元天璽碑言涪灘之歲是也皓嘗無道人
神憤疾而羣臣方稱述符瑞讚述功德蓋刻石之後

四年遂為晉所俘矣

金石錄

在宜興世謂之囷碑

詰道石
刻錄

國山碑吳主孫皓刻碑形如鼓篆文周繞多漫滅俗

號囷碑在宜興縣

古今
碑刻

吳志天璽元年吳興陽羨山有空石長十餘丈曰石
室郡表為瑞遣兼司徒董朝兼太常周處封禪各山
大赦改明年為天紀即前所云水洞是也山後有封
禪碑土人目曰囷碑以其石圓八出如米廩云字畫
奇古歲久多磨滅訪得舊刻以今文寫之前缺廿六

字之

字 缺三

于茲格于上下光被八幽螺飛螭動無不

歸仁是故

字 缺十

貽

字 缺七

上尊

字 缺廿七

靡不遑暇民用丕

作於

字 缺一

丞相

字 缺一

太常

字 缺一

奉迎

字 缺六

率禮備儀

缺十宮

缺廿四字

所臨徘徊西巡遂基大宮玉燭

缺三澤

缺一字

清萬民子來不日

缺六字

延頸跂足

缺二字

來庭柔

服以仁

缺四字

日昃不暇

缺一字

觀六經旁貫百家思該

道根數世陵遲大繇未光闔立東觀

缺三字

言建論典

墳采詢微聞窮神極化無幽不闡舉逸遠佞寬罪宥

刑尊道尚功嘉善矜弱哀賤愍凶

字 缺二

朽枯上天感

應

字 缺五

踐阼初并特發神夢膺受錄圖玉璽啓自神

匱神人指授金冊青玉符者四日月抱戴老人星見
者一十有七五帝瑞氣黃旗紫蓋覆被宮闕顯著牛
斗者一十有九麟鳳龜龍銜圖負書三十有九青蛇
白虎丹鸞鳳魚鳥二十有二白虎白麋白鹿白兔三
十有七白雉白鳥白鵲白鳩一十有九赤鳥赤雀二
十有四白雀白鸞二十有七神魚吐書白鯉騰船者

二靈絮神蠶彌被原野者三嘉禾秀穎甘露凝液六

十有五殊幹連理六百八十有三明月火珠璧水青

鼓三十有八玉燕缺玉羊玉鳩者三寶鼎神鐘神甕

夏祝神鬲三十有六石室山石門石印石羊缺石

缺者三缺石缺湖澤門通應識合謠者五神

缺僮雲母神女告徵表祥者三十有七靈夢啓識

神人授書著驗缺者十祕記識文玉板紀真者缺

玉刀玉印文采光發者八缺玉琯玉璫玉瑗玉稱

殊輝異色者三十有三玉尊玉盃玉盤璽清潔光朗

者九孔子河伯子胥王

缺一字

宣言天平地成天子出

東門鄂者四大賢司馬徽虞翻推步圖緯甄賈啓緘

發事興運會者二其餘飛行之類植行之倫希古所

覲命世殊奇不在瑞命之篇者不可稱而數也於是

旃蒙協洽之歲月次陬訾之口日維重光大淵獻行

年所值實惟茲歲帝出乎震周易實著遂受上天玉璽

文曰吳真皇帝玉質青黃解理洞徹拜受祇恐夙夜

惟寅夫大德宜報大命宜彰乃以柔兆涖灘之歲欽
若昊天月正華元郊天祭地紀號天璽實彰明命于
是丞相沈太尉璆大司徒燮大司空朝執金吾修城
門校尉歆屯騎校尉悌尚書令忠尚書昏直晃昌國
史瑩覈等僉以為天道玄默以瑞表真今衆瑞畢至
四表納貢幽荒百蠻浮海慕化九垓八埏罔不被澤
率按典繇宜先行禪禮紀勒天命遂於吳興國山之
陰告祭刊石以對揚乾命廣報坤德副慰天下喁喁

之望焉中書東觀令史立信中郎將臣蘇建 其文

大槩言符瑞初無可取故備錄之以見皓之亡有自

矣

宋趙彥博
雲麓漫抄

吳巖山紀功碑

篆書不著名字今其文字斷續不可悉考有曰天璽

元年者其餘大抵言天錫讖命之意按吳歸命侯天

璽元年歷陽山石成文刻石作頌此當是也

集古
錄目

吳天璽元年斷碑其前云上天帝言又云大吳一萬

方又云天發神讖文天璽元年七月己酉朔又云天
讖廣多不解解者十二字嗚呼其言可謂妖矣據吳
志天璽元年秋八月鄱陽言歷陽山石理成字凡二
十明年改元大赦以協石文今此碑乃在金陵其文
與吳志所載亦異莫可考究按孫皓在位凡八改元
而六以符瑞然竟不能保其國蓋人事不修而假托
神怪以矯誣天命其不終宜矣

金石錄

吳神讖碑半無文理其粗成文者有云天發神讖多

所未解解者合五十七字深甄歷數永歸大吳可以
為怪誕矣此碣初在江寧縣南二十里石高二丈折
為三段人因名其岡為斷石岡焉至元和六年胡宗
師移置漕圃前年冬余有荆楚之役假道金陵見之
金陵府舍其字方嚴古雅殊有佳趣張懷瓘云吳皇
象善書此象書也皇象江都人仕至青州刺史
嘗覽黃長睿東觀餘論稱休明書人間殊少唯建業
有吳時天發神讖碑若篆若隸字勢雄偉後又閱趙

集古
後錄

明誠金石錄頗載碑所謂上天帝言大吳一萬方等語以為妖而不著其奇肖甫中丞搨一紙見寄大抵與漢隸殊異亦不用批法而挑拔平硬盡去碁筭斗環之累隸與篆皆不得而名之信所謂八分也雖稍磨泐不可讀而典刑盡在錄之篋中跋尾胡宗師不著臨池名而絕得魯公宋文貞碑側記法亦可取也

弇州山

人稿

又天發神讖碑世稱為皇象又定為蘇建若篆若隸

字勢雄偉舊在紫岩山後歸天禧寺又歸籌思亭又
移府學櫺星門近歲復徙入尊經閣下余屢欲搨之
未果今得觀元白所收本摩挲之誦書疑皇象多之
句以歸然以為建書者是也斷碣之夢元白想知之

久矣

玄牘
記

世稱此為三段石誌言乃華嚴文皇象書者予向見
一書辨此碑與國山碑俱蘇建書甚詳今已失記然
陳后山詩云書疑皇象多則亦未以為決然也玉泉

公自蜀還寄升庵楊先生為余所作蒼潤軒記言升
庵索及拓本予因拓一本致之一本貽陳公一本留
軒中而因附其事于下云

同上

吳天發碑人皆懾於怪誕始不能無疑疑久則信不
揣源本寸木岑樓蹄沔滄溟矣余直以為牛腹書耳
彼秦漢之跡所不論上之岐陽石三代彝器其文非
不奇舌皆爾雅典則何曾為牛鬼蛇神耶所謂彝器
者如彝常之必不可紊作如是器必作如是款絲髮

罔踰此古昔足尚也吳不前於漢秦三代也古疏昭
然可鏡何遽迷源忘本為怪誕所懾黃長睿書家張
湯是窮穴得鼠者亦稱之何也趙明誠以為妖其知
言哉古篆定當以岐陽石為第一其岫巖壇山比干
季札諸碑皆轉相附會斷不可信炯然心目亦無足

致疑也

金石
史

江寧府南天禧寺門外有石三段乃吳後主天璽元
年巖山紀功德石其文不全宋元祐六年轉運副使

胡宗師輦置漕臺後圃仍題其末今在府學顧起元
曰府學中三段石碑按實錄吳天冊元年吳郡臨平
湖開又於湖邊得石函函中有小石青白色長四寸
廣二寸刻上作皇帝字於是改元天璽立石刻於巖
山紀吳功德其文乃東觀今華覈作戚光續志云象
書獨步漢末沉體兼篆籀誠宜居周鼓秦刻之次魏
鍾繇諸碑勿論也其石四方面背潤書各八行兩旁
狹書二行其文書滿三方而虛其一辭雖不可讀其

可識者百八十餘字

金石文
字記

吳九真太守谷府君碑

鳳凰元年四月立右谷朗者事吳為九真太守碑無
撰人名氏其序云府君諱朗字義先桂陽耒陽人豫
章府君之曾孫公府君之孫郎中君之子也其先出
自顓頊益為舜虞賜姓羸氏至於靡子封於秦谷因
而氏焉谷氏在吳不顯史傳無所見所謂豫章府君
而下三世皆莫知其名字按秦本紀非子邑於秦而

此與朗子永寧侯相碑皆為靡子莫詳其義也

六一
題跋

吳臨海侯相谷府君碑

無年月附于其父碑之次

金石錄

吳偏將軍凌統碑

在吳縣東北二十五里臯京山東碑云統字公績吳

興餘杭人也志毅果敢常為前鋒

寰宇記

吳陶基墓碑

在當塗縣橫山

輿地
碑目

吳思賢碑

孫子墓在南郡永安中太守夏侯嵩於墓邊立思賢

碑豫章記

吳六里山石刻

在海鹽天冊元年梅蒙協洽之歲孟冬陽月日惟壬

寅朔石簣神遺忽自開發拾得青玉璽篆文吳真皇帝

帝共三十八字輿地碑目

蜀碑

蜀鄧芝闕

蜀戶部尚書鄧芝闕銘九字又有小字題識漫滅不可讀莫知為何代所立資古所錄魏晉三國遺文獨

無蜀刻姑以附錄之卷中

資古紹志錄

蜀諸葛亮紀功碑

南寧夷叛史萬歲擊破之行數百里見諸葛亮紀功

碑銘其背曰萬歲後勝我者過此

北史史萬歲傳

蜀姜維碑

在南康軍吹角埧城今已磨滅

輿地
碑目



六藝之一錄卷五十六

欽定四庫全書

子部

六藝之一錄卷五十七

詳校官中書臣陸湘

貢外郎臣牛稔文覆勘

總校官檢討臣何思鈞

校對官中書臣陸湘

謄錄監生臣胡念祖

欽定四庫全書

六藝之一錄卷五十七

錢唐倪濤撰

石刻文字三十三

晉立太公碑

汲縣城北三十里有太公泉泉上又有太公廟廟側
高林秀木翹楚競茂相傳云太公之故居也晉太康
中范陽盧無忌為汲令立碑於其上太公避紂之亂
屠隱市朝遯釣魚水何必渭濱然後磻溪苟愜神心

曲渚則可磻溪之名斯無媿矣

水經注

右晉太公碑其略云太公望者此縣人大晉受命四海一統太康二年縣之西偏有盜發冢而得竹策之書書藏之年當秦坑儒之前八十六歲今以晉書武帝紀考之云咸寧五年汲郡人不準掘魏襄王冢得竹書小篆古書十餘萬言藏於秘府與此碑年月不同碑當時所立又荀勗校穆天子傳其敘云太康二年與碑合可以正晉史之誤其曰小篆書亦謬也且

其書既在秦坑儒八十六歲之前是時安得有小篆乎碑又云其周志曰文王夢天帝服玄襪

襪字字書所無以

立於令狐之津帝曰昌賜汝望文王再拜稽首太公於後亦再拜稽首文王夢之之夜太公夢之亦然其後文王見太公而訊之曰而名為望乎答曰唯為望文王曰吾如有所見於汝太公言其年月與其日且盡道其言臣以此得見也文王曰有之有之遂與之歸以為卿士而史記太公世家曰西伯將出獵卜之

云 於是西伯獵果遇太公於渭之陽與語大悅曰

自吾太公望子久矣故號之曰太公望載與俱歸二
說殊不合而王逸注楚詞亦載文王夢太公事與碑
所書略同方逸為注時此書未出逸必別有所據碑
又云其紀年曰康王六年齊太公望卒參攷年數蓋
壽一百一十餘歲而史記亦不載按前世所傳汲冢
諸書獨有紀年穆天子傳師春等不載所謂周志者
不知為何書而杜預左氏傳後注云汲冢書凡七十

五卷皆藏秘府預親見之以此知不特十餘萬言史之所記蓋不能盡其亡逸見於今者絕少也太公碑汲縣令盧無忌立後題太康十年三月云

金石錄

太公廟碑今在衛州共縣晉太康十年立其文可識曰太公望者此縣人太康二年縣之西偏有盜發冢而得竹策之書書藏之年當秦坑儒之前八十六歲其周志曰文王夢天帝服玄襪以立於今狐之津帝曰昌賜汝望文王再拜稽首太公於後再拜稽首文

王夢之夜太公夢之亦然其後文王見太公而訊之
曰而名為望乎答曰唯文王曰吾如有所見於汝太公
言其日且述其言臣以此得見也文王曰有之有之
遂與歸以為卿士其紀年曰康王六年齊太公卒蓋
壽一百一十餘歲史記謂東海上人西伯與語大悅
曰自吾先君太公望子久矣故號之曰太公望又曰
呂尚處世隱海濱西伯拘羑里檄宜生閔天素知而
招呂尚言呂尚所以事周雖異然要之為文武師蓋

不得其詳乃廣徵異說其謂東海上人則得于孟子
其先君望子則得於墨子至拘美里則戰國辨士之
論也灼龜而得兆立以為師今緯書有之曾不知諸
侯無太師而東海時避紂耳則得以為鄉士其說是
也詩曰維師尚父則知為武王師也竹書最古當魏
安釐王時國史也則所書宜可信其言服玄襪而說
文無此字惟曰漢令解衣耕謂之褻而衛宏字說與
郭昭卿字指則有之知許慎所遺古文衆矣昭卿因

宏以有記非得是碑豈知宏之為有據哉晉紀言咸

寧五年盜發汲郡冢與此碑異知史誤也

廣川書跋

太公望表八分書太康十年三月今在汲縣西門太

公廟水經注曰縣故汲郡治城西北有石夾水飛湍

激急人亦謂之磻溪言太公常釣於此也今其文曰

般谿之山明靈所託般即磻之異矣

金石文字記

恬漠先生翼神碑

河水南導于千嶠之山其水北流纏絡二道漢建安

中曹公西討巴漢惡南路之險故更開北道自後行
旅率多從之今山側附路有石銘云晉太康三年弘
農太守梁柳修復舊道太嶠以東西嶠以西明非一
嶠也西有二石又南五六十步臨溪有恬漠先生翼

神碑蓋隱斯山也

水經注

帛仲理墓碑

渥水東與千金渠合周書曰我卜渥水西謂斯水也
東南流水西南有帛仲理墓墓前有碑題云真人帛

君之表仲理名護益州巴郡人晉永寧二年十一月

立

水經注

譙定王司馬士會冢碑

過水南有譙定王司馬士會冢冢前有碑晉永嘉三年立碑南二百餘步有兩石高丈餘半下為東竹交文制作工巧石榜云晉故使持節散騎常侍都督揚州江州諸軍事安東大將軍譙定王溫司馬公之神

道

水經注

在亳州

金石略

黃門侍郎潘岳墓碑

羅水西北逕潘岳子父墓前有碑岳父比瑯琊太守
碑石破落文字缺敗岳碑題云給事黃門侍郎潘君
之碑碑云君遇孫秀之難闔門受禍故門生感覆醢
以增慟乃樹碑以記事太常潘尼之辭也

水經注

晉潘岳碑在中牟縣西北七里平秩鄉墓側

訪碑錄

順陽太守丁穆碑

丹水東逕南鄉縣北興寧末太守王靡之改築今城
城北半據在水中左右夾溪深長及春夏水漲望若
孤洲矣城前有晉順陽太守丁穆碑郡民范甯立之

水經注

杜元凱碑

沔水又東逕方山北山上有鄒恢碑魯宗之所立也
山下潭中有杜元凱碑元凱好尚後名作兩碑並述
己功一碑沈之峴山水中一碑下之於此潭曰百年

之後何知不深谷為陵也山下水曲之隈云漢女昔
遊處也故張衡南都賦曰遊女弄珠於漢臯之曲漢
臯即方山之異名也

水經注

襄陽城南門道東三碑

建安十三年魏武平荊州分南郡立為襄陽郡荊州
刺史治邑居隱賑冠蓋相望一都之會也城南門道
東有三碑一碑是晉太傅羊祜碑一碑是鎮南將軍

杜預碑一碑是安南將軍劉儼碑

水經注

羊祜墮淚碑

沔水又逕峴山東山上有桓宣所築城孫堅死於此
又有桓宣碑羊祜之鎮襄陽也與鄒潤甫嘗登之及
祜薨後人立碑於故處望者悲感杜元凱謂之墮淚
碑山上又有征南將軍胡羆碑又有征西將軍周訪

碑山下水中杜元凱碑處

水經注

襄陽百姓於峴山祜平生遊憩之所建碑立廟望其

碑者無不流涕杜預因為名墮淚碑

晉書羊祜傳

襄陽太守胡烈碑

沔南有固城城側沔川即新野山都縣治也襄陽太守胡烈有惠化補塞隄決民賴其利景元四年九月

百姓刊石銘之樹碑於此

水經注

晉立諸葛武侯舊宅銘

沔水又東逕隆中歷孔明舊宅北亮語劉禪曰先帝三顧臣於草廬之中咨臣以當世之事即此宅也車騎沛國劉季和之鎮襄陽也與捷為人李安共觀此

宅命安作宅銘云天子命我于汜之陽聽鼓鞀而水
思庶先哲之遺光後六十餘年永平之五年習鑿齒

又為其宅銘焉

水經注

晉立張平子碑

河間諱衡字平子南陽此縣人也體德純和秉行孝友
加以俊才命世英識秀建崔子士為之

下闕

造化高才瑋

藝與神合契君子以為裒然聞之風聲至於仕乎史官
算二儀之數研陰陽之理

闕

日月致巧渾儀有極深

探賾之思數往知來之驗此崔生所以發德音也若夫
好學博古貫綜謨藉典墳邱索之流經禮訓詁之載百
家九流之辯詩賦雅頌之辭金匱玉板之奧讖契圖緯
之文音樂書畫之藝方技博奕之巧自洪範彝倫以還
若鄭子之所習介廬之所識者罔不該羅其情原始要
終故能學為人英文為辭宗紹義和之顯跡系相如之
遐風向若生於春秋之間游乎闕里之堂將同貫宰貢
齊衡游夏豈值取足於身中垂名於一涂哉是以先生

恒屈於不知己仕居下位再為史官而發應問之論時
不容道遂興思玄之賦爰登侍中則黨言允諧出相河
間則黎民時雍庸詎限其所至哉若夫巡狩誥頌所以
敷陳主德二京南都所以讚美畿輦者與雅頌爭流英
英乎其有味與若又造事屬辭因物興闕下筆流瀲潛
思發義文無擇辭言必華麗自屬文之士未有如先生
之善選言者也南陽相夏侯湛自涉境以經乎諸邑每
縣咨其故老訪其先賢有北者表其墓經墳者揖其魂

涂出魯陽行次西鄂眇孤山而頌闕英歷茲邑而懷夫

子暨路過瑩域止駕衢首覩封樹之蕭條觀高碑之稱

美於是慨然永思愴爾長懷若死者可起吾其與歸乃

延邑宰而問之曰昔武王入殷封比干之隴高祖經魏酌

信陵之墓此聖賢之所以禮忠旌能甄表明德也有可

以優其肩嗣者禮其在是而世胄絕紹支庶無聞於是

乃翦其墟落寵其宗人使奉其四時獻其粢盛遂糾集

舊跡攝載新懷而書之碑側以闡美抒思焉其辭曰

奕奕張生秉德淑清研深綜理思俊才英實掌天地幽
贊神明冠蓋興美傾漢流聲匪唯天象亦垂人文有炳
其猶有爍其新仰鑒遺藉馳心哲人殊世投好百載交
神奉命南邦行出爾涂爰及隧首輟駕前衢徘徊崇碑
逍遙故墟企仰罔瞻長懷焉如昔在先賢唯德是友古
而無死願言攜手世則茲泯道乃不朽在珠詠隋于璧
稱和戢寶無彫人壽幾何望兼京壹思踰竝河

碑以直為直以黨言為謹言以蕭條為蕭條

右張平子碑晉南陽相夏侯湛作水經云西鄂縣有平子墓墓東有碑文字悉是篆崔瑗之辭也盛弘之郭仲產並云夏侯孝若為郡簿其文復刊碑陰為銘然碑陰二銘乃崔子玉及陳翕隸字耳墓次又有二碑唯見其一以夏景驛途疲而莫究酈氏之說如此今世所傳凡百君子者即平子篆碑其石已中斷合向城後碑始能成文此刻有夏侯湛姓名而云書之碑側蓋酈氏考之不詳也魏隸自范式之後隸釋悉

棄不取吳之谷明陸禕晉之游述鄧又諸碑皆體弱
格卑已去黃初遠甚視熹平光和年所刻殆天冠地
屨之不侔也此碑在同時字畫中僅有可觀因贅之
篇尾亦以見一代佐書其工者止此爾

隸
釋

晉張平子碑陰頌南陽相夏侯湛撰隸書不著名氏
湛因行縣至西鄂過衡墓刻此頌于碑陰

集古
錄目

右張平子碑晉南陽相夏侯湛撰識緯之文興於西
漢之末而爛熳于東漢之世雖一時名儒皆從而惑

馬獨平子奮然闢之甚力余嘗歎以謂如平子可謂
豪傑之士不為流俗所移者今湛為此碑乃云金匱
玉版之奧識契圖緯之文罔不該羅其情可謂不知

平子矣

金石錄

晉立魏大長秋游述碑

右大長秋游君碑云君諱述字庶祖按元和姓纂云
魏河南尹游述始居廣平六代孫後魏尚書明根生
僕射肇今碑亦云述廣平人惟姓纂云述為河南尹

以碑考之蓋未嘗為此官又按後漢書百官志大長秋承秦將行宦者景帝時更名大長秋或用士人中興常用宦者述嘗為宛句長尚書郎左丞元城令治書侍御史南安北海安平東郡太守符節令遂為大長秋皆非宦者之職然則魏制蓋亦參用士人矣

金石

錄

碑云君諱述字庶祖廣平任人也晉泰始十年九月

乙丑卒咸寧三年九月甲子造

寶刻叢編

游君碑陰

右游君碑陰按王莽嘗下令禁二名故當時士人皆以一字為名東漢時尚爾今此碑陰所記凡二百五十三人亦無一人二名者碑晉咸寧中建距莽時二百年矣而士大夫猶遵莽之令不變何哉

金石錄

晉立吳征北將軍陸禕碑

隸書不著書撰人名氏禕字元容吳郡吳人仕吳至

征北將軍海鹽縣侯碑以東晉泰寧三年立

集古錄目

晉陸禕碑此碑云禕字元容吳郡吳人其先家于陸鄉因氏姓焉顯考吳故左丞相禕赤烏六年召宿衛郎中轉右郎中左郎中治書執法平中校尉平義都尉五官郎中騎都尉遷黃門侍郎封海鹽縣侯加禕將軍行左丞相鎮西大將軍事又云委戈執笏入賓皇儲而吳志云孫皓大鼎元年以陸凱為左丞相又云凱之子禕初為黃門侍郎出領部曲拜偏將軍亡後入為太子中庶子皆與此碑合而此碑晉泰寧三

年立也

南豐集
古錄

晉泰寧三年立在秀州

金石
略

晉南鄉太守司馬整碑

右南鄉太守碑不著書撰人名氏題曰宣威將軍南鄉太守司馬府君紀德頌碑云君諱整字孔修太宰安平王之孫太尉義陽王之子按晉書宣帝弟曰安平獻王孚孚次子曰義陽成王望望第三子隨穆王整整先望卒後武帝分義陽之隨縣封整為王謚曰

穆整以太始三年自南鄉太守徙南陽而南鄉人共立此碑今在光化軍軍即襄州穀城縣之陰城鎮按晉書不列南鄉郡據此碑所載縣令名氏有武陵葉陽丹水陰城順陽祈六縣此蓋南鄉郡所治也晉志但云南鄉魏時屬荊州武帝平吳改為順陽郡而不著順陽治所興廢屬縣之名而獨此碑可見也又整傳但云整歷南中郎將封清泉侯薨贈冠軍將軍亦不言其為宣威將軍南陽二郡守皆其所漏略也

集古

錄

右晉南鄉太守司馬整頌云初仕魏拜郎中中郎議
郎諫議大夫騎都尉給事中轉拜治書侍御史咸熙
二年出臨鄙郡加宣威將軍又云謁者就郡拜君世
子執節四讓推與兄嗣固辭懇誠泰伯三美君又加
焉又云泰和三年十一月使者奉詔策命君南中郎
將就統宛都按晉史整事跡附見安平獻王孚傳後
云兄奕卒以整為世子歷南中郎將封清泉侯早卒

其餘官閥皆不載據史言兄奕卒以整為世子而碑言推與兄嗣二說不同當以碑為正

金石錄

晉宣威將軍南鄉太守司馬整頌泰始四年己巳建書為隸古氣質渾厚與鴻都石經可一二校也碑言整安平王之孫義陽王之子仕魏拜郎中中郎議郎諫議大夫騎都尉給事中治書侍御史咸熙二年出臨宛郡加宣威將軍就郡拜庶子泰始三年十一月使者奉詔冊命為南中郎將統茲宛郡今考晉書整

義陽王望之子初奕為義陽世子奕卒整嗣封清泉
侯追贈冠軍將軍自郎中議郎史不盡書如宣威將
軍中郎南郡守則見於法書而史氏闕之碑自泰始
四年建則侯于清泉皆自宛郡後然頌曰出臨鄙郡
自托于詞亦何陋也漢之衰文物隨敝至晉不勝淺
陋殆無前人一言一語雖政教汗隆文章與時高下
然自是氣質卑薄至論述次第亦已失當此可怪也
整在當時蓋公族一少年名爵未立頌語至謂稟乾

坤之純靈並聖賢而誕興其在南郡謂洪恩淪于不測覆養包乎無外巍巍之功揚于仄陋其受冊命慶雲隨之夫儻人必於其倫非其倫者人亦不得受之

文字之壞至此可嘆也

廣川書跋

南鄉太守碑陰

右南鄉太守將吏三百五十人分為二卷其磨滅者猶有二十餘人人皆有邑姓名字而無次序其名號有令有長有南閭祭酒門下督主簿部督郵監汀督

郵部勸農五官掾文學掾營軍軍謀掾府門亭長主
記史待事掾待事史部曲將部曲督又有賊曹功曹
議曹戶曹金曹水曹科曹倉曹鎧曹左右兵曹曹皆
有掾又有祭酒有史有書佐有修行有從掾位有從
史位有史有小史等魏晉之際太守官屬之制蓋如
此他書或時見一二不能如此之備也

集古錄

右南鄉太守司馬整按晉書宣帝弟曰安平獻王孚
孚次子曰義陽成王望望第三子曰隨穆王整整先

望卒後武帝分義陽之隨縣封整為王謚曰穆整以
魏咸熙三年為南鄉太守是歲晉武受禪改元泰始
泰始三年徙整南陽而南鄉人為整建此碑晉書地
理志當魏末荊州分屬三國而南鄉南陽皆屬魏後
晉武帝改南鄉為順陽此碑今在光化軍軍即襄州
穀城縣之陰城鎮陰城當魏晉時為南鄉屬縣也余
貶乾德縣令時得此碑今二紀矣嘉祐八年九月二

十六日書

六一
題跋

晉南鄉郡建國碑

右晉南鄉郡建國碑已斷裂不完其額題南鄉郡建國之碑其大畧云嘉平五年漢水滔溢毀壞舊城又云正元二年城此其餘文字可識處大畧述遷郡事而銘文有與晉常存之語知其為晉碑也按晉書地理志建安十三年魏武帝盡得荊州之地分南陽郡西界立南鄉郡及晉武平吳太康中改南鄉為順陽而不載遷郡事此碑蓋太康以前立故仍稱南鄉郡

也碑有云河內司馬府君者整也嘗守是郡自有碑
此碑既無建立年月因附於整碑之次焉

金石錄

晉右軍將軍鄭烈碑

不著書撰人名氏字為隸書烈字休林滎陽人官至
兖州刺史輕車將軍平莞侯拜議郎卒贈右將軍謚
曰僖故吏殿中監申揚等立此碑以太康四年立

集古

錄目

右晉鄭烈碑云君諱烈字休林又云曾祖先生皇祖

徵君顯考將作大匠實有茂德載在國策烈晉史無
傳以碑考之嘗為文帝參佐武帝時仕為兗州刺史
封東莞男以疾徵拜議郎卒於太康二年追贈右軍
將軍謚曰僖侯云

金石錄

晉故右軍將軍平莞侯鄭府君之碑隸額鄭君名烈
滎陽人仕於晉初至兗州刺史輕車將軍召拜議郎
以太康二年八月卒故吏申揚等立此碑四年之七
月也鄭君所封其上一平字則曉然可識下一字則

微有缺損小歐陽謂之平莞侯趙氏以為東莞則誤也晉縣亦無平莞非鄉名則亭名也予嘗以魏末至晉末隸字無可取者晚獲此碑其勁健方格顧後絕

配若雜置漢刻中未易甄別

隸續

晉護羗校尉彭祈碑

右晉彭祈碑云君諱祈字子玄隴西襄武人也其先出自顓頊有陸終之裔子大彭實主夏盟則其後也又云歷郡右職州別駕從事于時庸蜀未殄侵擾王

路洮西之戰因敗運奇元帥獲安尅厭疆虜列上功
狀除舍人還參本軍事除涼州護軍河右未清戎寇
鼎沸謨謀神略簡在帝心遷西郡太守至官未久復
臨酒泉遠夷望風襁負歸命白山丁令率服賓貢敷
煌令孤豐距違王度淵泉之陳兵不血刃母老弟亡
辭職去官聖上仁慈聽君所求轉略陽太守近家祿
養遂罹大難侍喪還家服紀終始有詔以軍州始分
河右未靖豺狼肆虐授君節蓋除護羌校尉統攝涼

土前後軍功應封七侯勞謙退讓陰德不伐年未知
命以太康十年三月癸酉薨天子愍悼遣使監護喪
事策曰君秉心公亮所任有方不幸殞歿朕甚痛惜
故孝廉參護羌軍事酒泉馬朔故吏闕郎中綦毋番
主簿郭曉良吏夏侯俊等追思洪烈感想哀嗟乃刊
石勒銘焉西晉石刻見於今者絕少又多殘缺此碑
文字完好可喜乃錄其終始事跡如此

金石錄

元康元年有碑陰

金石略

晉彭祈碑陰

右彭祈碑陰題名者凡三百十二人有故孝廉計掾
計史良吏廉吏計佐主簿領校錄事中部督郵西部
督郵軍議從事和戎從事記室督軍謀從事錄事史
戶曹史賊曹史金曹史田曹史倉曹史鎧曹史兵曹
史客曹史記室史節史車曹史水部都督中部都督
功曹典事武猛從事舍人蜀渠都水行事中部勸農
西部勸農東都水蜀渠平水門下賊曹門下議生錄

事金曹掾兵曹掾作部史法曹史參戰騎督步督散
督門下書佐弓馬從事監牧史戟史金曹典事武猛
史門下通事門下小史凡一官多者十人少者不減
數人其餘稱故吏無官號者百六十餘人當時州郡
官屬其濫如是蓋自漢以來太守皆自得署置僚佐
彭君為邊郡守故其所辟尤衆今蓋錄其名號以見

一時之制焉

金石錄

晉雲南太守碑

右晉雲南太守碑文字殘缺其姓氏名字鄉里皆不可考略可見者嘗為尚書令史察孝廉除郎中遷武陽令從龍驤將軍王濬征討遷雲南太守年五十有七卒最後題太熙元年正月上旬造太熙武帝年號

也
金石錄

晉議郎陳先生碑

隸書不著書撰人名氏碑字斷缺其可見者曰延頴川許昌人不知其為名與字也其額曰晉故議郎陳

先生碑元康二年門生尹含等立

集古錄目

元康二年十二月

金石錄

元康二年在長葛

墨池編

晉尉氏令陳君碑

隸書今碑石殘缺不可悉考其可見者曰字道臧太尉掾之小子其額曰晉尉氏令陳君碑以此知其官

及姓氏也

集古錄目

晉金鄉長薛君頌

右薛君頌在今濟州金鄉縣汝南薛君之頌云
君諱詣字公謀其他文字皆完好驗其詞蓋縣
長德政頌耳雖無建立年月而有吳寇未闕耀威海

隅之語知其為晉碑也

金石錄

晉太子詹事裴權碑

元康九年有碑陰在西京

金石略

元康九年十二月

金石錄

晉裴權後碑

有碑陰

金石略

晉光祿勳向凱碑

右晉向凱碑云君諱凱字士伯河內山陽人也其後
歷敘官閥甚詳其最顯者嘗為中書侍郎尚書吏部
郎給事黃門侍郎賜爵關中侯廣平太守散騎常侍
游擊將軍北中郎軍司兖州刺史中郎將後云累遷
河南尹春秋六十有八元康九年四月甲子薨追贈
光祿勳據此乃當時顯人而晉史無傳故其事跡莫

得而考蓋君子所賴以傳者非爵位也顧所立如何耳自古老死邱壑而名稱顯著者甚衆雖在高位而功烈不見於當時聲蹟無聞於後世者亦可勝數哉

金石錄

晉鴻臚成公重墓刻

右晉成公重墓刻云永寧二年四月辛巳朔十五日乙未守鴻臚關中侯成公重魏夫人之靈柩前世以永寧紀年者三漢安帝晉惠帝偽趙石祗按三國志

建安三十年曹操始置關中侯十七級安帝時猶未
有此號而石祇永寧無二年然則重蓋惠帝時人也
晉史有成公簡成公綏皆東郡白馬人

金石錄

晉陸階碑

右晉陸階碑階為宣威內史建武元年卒碑以咸和
七年立而碑後題云咸和七年歲在庚辰咸和成帝
年號也成帝以泰寧三年八月即位是歲乙酉明年
改元咸和據歷七年當為壬辰而此為庚辰者繆也

陸氏有二碑余家集錄皆有之據陸禕碑後題云泰寧三年歲在乙酉與今厯合則當時厯官不應至咸和而頓爾差失然則庚辰特書碑者誤爾

集古錄

隸書不著書撰人名氏喈字公聲禕之子也東晉初官至宣威內史前將軍碑以咸和七年六月立

集古錄目

宣城內史陸喈咸和七年秀州

金石略

晉建威將軍竺使君碑

晉故建威將軍益州刺史領建平太守平恩縣侯竺

使君之碑隸額君諱瑤以泰光三年薨故吏張顧之

等立此碑又一碑主簿費敷等立無額作兩段

復齋碑錄

思平縣侯竺使君碑在金陵鄉張陣湖

天下金石志

晉謝重墓碑

隸書小字晉驃騎大將軍開府儀同三司故長史豫

州陳郡陽夏縣都鄉吉遷里謝重字景重隆安三年

己亥六月二十六日丙午薨以七月九日癸酉葬

復齋

碑錄

晉紀穆侯碑

凡二十四字曰晉故僕射散騎常侍驃騎大將軍開

府儀同三司紀穆侯之銘

集古錄目

碑上缺

伯成仕至司徒存四十九字在句容縣治

復齋碑錄

晉平西將軍廣漢侯葛府君碑

平西將軍墓銘王右軍書未詳

金石略

在句容縣西七里墓前

訪碑錄

晉冠軍將軍史侯墓石柱

晉冠軍將軍中壘校尉北中郎將五兵尚書

闕州刺

史史侯墓石柱在溧陽

諸道石刻錄

晉呂府君墓誌

正書題云晉故尚書起居郎廬陵太守呂府君之墓

誌在溧陽恐是唐人所立

後齊碑錄

晉夜郎太守母稚碑

晉故寧遠將軍綏蠻護軍夜郎太守母府君之神碑

隸額二十字君諱稚字君孫隆安三年歲己亥十月

十五日主簿張熊等立

集古錄目

碑陰司馬行談指令巴西陳闕叅軍事行夜郎令巴

西楊玉等題名

復齋碑錄

晉都鄉侯斷碑

上半不存不知姓名末行有升平二年三月上旬立

復齋碑錄

晉散騎常侍周處碑

陸機文王右軍書後人重立在常州

金石略

宜興周孝侯墓有古碑一通云晉平原內史陸機撰
右軍將軍王羲之書跋尾云唐元和六年歲次辛卯
十一月十五日奉承郎守義興縣令陳從諫重樹此
碑後又有一條前試太常寺協律郎黃某書名與書
皆模糊而書字微可推當是後人因陸機撰下有空
石妄增右軍將軍王羲之書以重其價耳文內初載
處事大約與傳同至於弦絕矢盡左右勸退處按劍
怒曰此是吾効節授命之日何以退為我為大臣以

身殉國不亦可乎下忽接韓信背水文差不成句又云莫不梯山架壑襁負來歸云云元康九年因疾增加奄捐館舍春秋六十有二天子以大臣之葬師傅之禮親臨殯壤建武元年冬十一月甲子追贈曰孝侯禮也賜錢百萬葬地十頃京城地五十畝為第又賜王家田五頃詔曰處母年老加以遠人朕每愍念其二年月日葬於義興舊原按處以永平七年戰歿贈平西將軍賜錢葬地及給處母醫藥酒米俱如碑

蓋又十五年而元帝稱制追封孝侯建武其年號也
時陸平原歿已久矣豈於樹碑之際而為處後者竄
入謚孝侯一句耶然不應以永平之詔移入建武後
至所謂梯山架壑奄捐館舍天子以師傅之禮等語
又似平原它文錯簡然考之吳及晉初無元康年號
不可曉也書結構雖小踈筆亦過強而中間絕有姿
骨督策之際大得鍾王意在李北海張從申間又不
可以其譌而易之也

奔州山人藁

宜興周處碑元美考據極詳大都謂碑文記處以身
殉國死戰矣而忽又云元康九年以疾捐館前後不
續攷吳晉俱無元康年號且贈處將軍賜葬地給其
母醫藥酒米等皆永平七年戰歿時事其後十五年
建武元年乃謚孝侯而碑併作建武年事建武元年
陸機已歿安得文及之蓋碑前陸機撰下有空石後
人妄增義之書以重其價耳又碑後云唐元和六年
歲次辛卯義興令陳從諫重樹此石協律郎黃其書

尤為可疑余則謂碑中有唐元和重樹等語實出黃
某所書其人習右軍者後人見似右軍遂加羲之字
陸平原文不及謚孝侯事重書刻時或以意增之耳
而以身殉國以下元康九年等語錯簡則不可曉豈
陳從諫刻後又有刻者亂之耶然不應謬妄至此
今但以其書有右軍遺意姑存之以待博識者

石墨
鐫華

晉王右軍行書周孝侯碑士君子貴砥礪名節不貴
逶迤甘忍周子隱少年名陷輕薄至父老比之三惡

一旦發奮遂為江右名流頃於陸士衡集見其碑令人慨然遠想意欲適宜興上斬蛟橋摩挲石刻以還今日秋澗兄出所藏石本觀之愈為暢快秋澗文雅博達家有古刻數百種居復近子隱讀書臺傍每風日晴美上故基宿莽想像當日丰韻誦少陵蕭條異代之句以歸而燈下在古石洞天展平原文會稽字畫夜深而寢恨予不得從之游也余既得厭觀此本而秋澗命書數字於上捉筆笑曰佛頭堆糞正是此

類座中遇米顛幸勿出示彼必連道惶恐殺人也嘉

靖甲寅七月四日

玄牘紀

晉司馬駿碑

司馬駿鎮關中善撫馭西土百姓為之樹碑長者見

碑無不下拜

晉書本傳

晉唐彬碑

唐彬為幽州百姓追慕彬功德生為立碑作頌

晉書本傳

晉閻德碑

唐彬初受業于東海簡德德目彬有廊廟材及彬官

成而德已卒乃為之立碑

晉書唐彬傳

晉陶侃碑

咸和中侃故吏刊石碑畫像於武昌西

晉書本傳

晉高原碑

高閭五世祖原晉安北將軍上谷太守關中侯有碑

在薊中

北史高閭傳

晉阮藉碑

在縣東四十五里阮臺鄉石馬村墓南二十步文字

缺落惟首尾存

訪碑錄

晉王戎碑

唯存數十字在西京

金石略

嘗見南朝王戎墓銘凡數百言其首書晉司徒尚書

安豐元公之銘

廣川書跋

晉郭文碑

咸和中湖州刺史孔彭立在臨安

訪碑錄

晉關內侯廣昌長暨遜碑

咸和中湖州刺史孔彭立於餘杭

訪碑錄

在餘杭縣西北三十里遜字茂言以孝行著聞咸康五年旌表閭門咸和中湖州刺史孔彭立

廖瑜碑碣目

晉王祥墓碑

在江寧縣之城西南何城寺之北斷缺不全

輿地碑目

晉右將軍曹橫墓碑

在晉陵縣東三十五里

輿地碑目

晉楊府君墓碑

名亮弘農人為雍州刺史有石碑二一在泊山一在

河澗各有巴蜀故吏姓名

輿地
碑目

雲南太守段宗仲德政碑

在通泉縣段宗仲墓下

輿地
碑目

晉王猛碑

在華陰縣東八十里

案宇
記

晉孝婦嚴氏碣

咸康六年立在餘杭

訪碑錄

晉安邑令徐君碑

金石錄

晉丁議碑

南京

金石略

晉陳武王碑

索靖書在汾州

金石略

晉老父嚴氏碑

咸康五年立在杭州

金石略

晉巴西太守盧茂碑

在綿州

金石略

晉陳壽墓表

在果州

金石略

晉周胙墓石柱題

在單州

金石略

晉遂州刺史李豪碑

在綿州

金石略

晉西平侯顏含碑

在建康府

金石略

晉路君墓石闕文

永和元年在濟州

金石略

晉魏興太守單毅德政碑

在均州

金石略

晉張愷碑

在陝州

金石略

晉尚書令假節領軍將軍贈侍中成陽卞公墓誌

諸道石刻

錄

晉尚書左民郎建安太守史府君墓誌

諸道石刻

晉益州刺史羅君碑 在成都府

輿地碑目

晉廬陵冠軍將軍史爽墓誌 在溧陽縣

輿地碑目

晉順陽王碑 在固王古城

輿地碑目

晉征南將軍胡奮碑 在魯山

元和郡縣志

晉大中大夫包府君神道碑

墨池編

晉條令孔栩清德頌 在景州

天下金石志

晉桓溫墓碑 在太平府

天下金石志

晉榆次令荀藐碑 在榆次縣

天下金石志

晉北嶽祠堂頌

泰始六年立 金石略

晉興元新路記

凡七十字其刻曰太康元年乃晉武平吳時由此路

耳 輿地碑目

晉泰山君改高樓碑

升平三年六月立 金石錄

晉青山君神頌

永安元年九月立

金石錄

晉石柱文

太元十八年在劍州

金石略

晉義熙靈石社日記

石以二月社日

闕

先鑒傳銘于圮必泰今大墓既正

皇晉中興西寇有獨盡之勢闕洛有可乘之兆年豐

氣和物寧其極曠代冥徵復著於今輒將奉時仰協

人會飛旂命族廓寧岷夏矣義熙三年二月八日戊

申社日記

復齋
碑錄

赤松子山石銘

在富陽縣孫文度銘僅有義熙八年三月壬寅朔九

日庚戌廬江縣清都鄉承貴里何秀之字景叔二十

八字

庾瑜碑
碣目

豐年碑

在重慶府江岸謂之義熙碑每水落而碑出則年豐

人爭摹打數十年不一見

輿地
碑目

偽漢

偽漢司徒劉雄碑

右偽漢劉雄碑其額題故使持節太宰侍中司徒公
領右部魏成獻王之碑碑云公諱雄字元英高皇帝
之胄孝宣帝玄孫值王莽篡竊遠遁邊朔為外國所
推遂號單于累葉相承家雲中因以為桑梓焉劉雄
元海弟也晉書載記元海本匈奴人冒頓之後漢高
祖以宗女妻冒頓約為兄弟故其子孫遂冒姓劉氏

今此碑直云出自宣帝宣元海初起假此以惑衆乎
碑後題嘉平五年歲在乙亥二月六日建按宋莒公
紀年通譜劉聰以晉懷帝永嘉四年即偽位改元光
興明年改元嘉平嘉平四年改元則嘉平豈復更有
五年蓋載記初不編年故於改元歲月難考此碑當
時所立不應差謬蓋通譜誤也

金石錄

嘉平五年即晉愍帝建興三年也

金石略

偽趙

趙浮圖澄造釋迦像碑

右趙浮圖澄造釋迦像碑唐封演聞見記云內邱縣西古中邱城寺有碑後趙石勒光初五年立碑云太和上竺浮圖澄者天竺大國附庸小國王之元子也本姓濕此碑即演所見其說皆同按晉書藝術傳澄本姓帛氏今碑作濕碑當時所建宜得其真又史作佛圖碑作浮圖二字音相近耳惟光初乃劉曜年號而以為石勒時蓋演誤也

金石錄

劉曜光初五年即晉

關帝

年也

金石略

趙橫山李君神碑

右趙橫山李君神碑題建武六年歲在庚子三月己亥廿一日癸丑按晉書成帝紀石虎以咸和九年自立為趙天王而載記云咸康元年僭稱居攝趙天王據帝紀則建武六年歲在己亥據載記則歲在庚子宋莒公紀年通譜獨以本紀為據今此碑及西門豹祠殿基記並六年建皆云歲在庚子以此知帝紀之

失非此碑則晉紀與載記得失不可復考矣

金石錄

石虎建武六年即晉咸康五年也

金石略

趙西門豹祠殿基記

右趙西門豹祠殿基記云趙建武六年歲在庚子秋八月庚寅造西門祠殿基又云巧工司馬臣張由監作吏臣杜波馬孫殿中司馬臣王基殿中都尉臣潘倪侍御史騎都尉臣劉誼左校令臣趙升殿中校尉臣顏零等監其下刻物象甚多如土長強良碩章舒

懷雀之類其名頗異近歲臨淄縣人耕地得巧工司馬印遍尋史傳皆無此官名不知為何代物今乃見

於此碑云

金石錄

後秦

魏鄧乂廟碑

鄆城縣城南有魏使持節征西將軍太尉方城侯鄧艾廟廟南有艾碑秦建元十二年廣武將軍沅州刺

史闕內侯安定彭超立

水經注

右鄧又碑考其事蹟終始即魏鄧艾碑也艾嘗為兗州刺史據碑云晉初嘗發兗州兵討叛羗艾降巫者傳言授以用兵之法因以破羗兗人神之遂為艾立廟建碑紀其事艾於三國時為名將嘗有大功其姓名聞於世甚顯史與兗人皆不應誤而艾又二名不同如此此君子所以慎於傳疑也余謂古人艾又嘗通用漢書曰黎民艾安與懲艾創艾注皆讀為艾豈非鄧侯名艾音又而書碑者從省歟後人讀史無音

注乃直以為蒿艾之艾而流俗轉失久而訛謬遂不復正此理或然覽者詳之

集古錄

右鄧艾碑其額題魏使持節征西將軍方城侯鄧公之碑碑無建立年月以詞考之蓋當晉初立按魏晉史其名皆為艾而碑作又古艾又通為俊又又安之字疑艾名其音如此而今人讀如蕭艾之字恐非是又按平蜀艾即軍中拜太尉而碑但題為征西將軍者疑尋被禍未嘗受命而艾始封方城侯後改封鄧

侯碑尚云方城侯何哉

金石錄

鄧又碑集古錄謂考其事績則鄧艾碑也夫艾又同音蓋名又而音為艾字後世音讀既誤遂相傳如此
酈善長曰濮陽城南有魏方城侯鄧又廟廟尚有又碑秦建元十二年兗州刺史彭超立後秦去魏不遠
宜相傳可考至後世音失其讀則并其字而移矣然則書文之失其得一二而正邪

廣川書跋

六藝之一錄卷五十七